

REGIONAL NEWS BULLETIN

HEADLINES (MORNING)

1. Home Minister Pu K Sapdanga hova nimina Minister te inhmukhawm chuan Power Minister Pu F Rodinglana leh Assam Rifles te inkara thilthleng chu thleng nawn leh tawh lo se an duh tih an sawi.
2. Mizoram Commercial Vehicle Union in lungawi lohna lantira nawrh huaihawt an tum chu sorkar in nuar lo turin a duh a, mipui tana harsatna thlentir lo turin a ngen.
3. Prime Minister Narendra Modia chuan vawiin hian ni hnih cham turin Russia a pan dawn.
4. Hapta hnih awh tur khawvel sik leh sa leh chhehvel nungcha chhe mek siam tha tura inkhawpui United Nations Biodiversity Conference (COP16) chu nimin khan Columbia-ah tan a ni

..

<><><>

AR ISSUE

Home Minister Pu K Sapdanga hovin nimin khan tunhnaia Power Minister Pu F Rodinglana leh Assam Rifles te inkara thilthleng sawiho a ni a,

He thilthleng leh thil pawimawh dangte chu Chief Minister Pu Lalduhoman Assam Rifles Director General New Delhi ah a sawipui zui dawn a ni an ti a,

Pu F Rodinglana chung a thil thleng chu an dem tih sawiin hetiang hi thleng nawn tawh lo se an duh an ti a ni.

An sawihonaah hian Pu F Rodinglana leh Minister dangte an tel a ni.

Nimin vek khan MNF Vice President – Pu Lalchhandama Ralte, MLA chuan Power changtu Minister leh Assam Rifles indan buai chungchangah sorkar a ngawih reng chhan an hre duh a ti a.

Opposition leader Pu Lalchhandama Ralte chuan he thil thleng hi party dangten politics thilah an la lo a, Democracy leh mipui dikna chanvo tun din ni rawh se an ti zawk tih sawiin hnam anga tanrualna hun atan hman an beisei lain Mizoram sorkar a la ngawi reng a, an ngeng a chhun loh vang a ni thei a ni a ti.

ZPM Minister dang leh MLA dangte an ngawih tlat chhan pawh hriat an duh a ti a, Assam Rifles in minister an dang buai leh an duhna hmun hmuna check post an siam chu MNF Legislature Party chuan an dem tak zet tih a sawi nawn a ni, a ti.

(PR)

<><><>

POL

Tun hnaiah sorkarin tuialhtheia chhiah a tihsan avanga Mizoram Commercial Vehicle Union (MCVU) in lungawi lohna lantira nawrh huaihawt an tum chu Mizoram sorkar chuan nuar lo turin a duh a, mipui tana harsatna thlentir lo turin a ngen.

Hemi chungchanga sorkar thuchhuah tarlan danin, Commercial vehicle pawl thenkhatin mipui tana harsatna thleng palh thei hriaa nawrh ve loh an rel chu sorkar chuan lawmawm a ti a, hei vang hian tluang taka an service ngei theihna turin sorkar chuan hma a la dawn a; commercial vehicle zinga service duhte an duh anga an service ngei theihna turin sorkarin hma lak a tum a ni.

Sorkar chuan chhiah tihsan chungchangah mipui nawlpuiin nghet taka ding turin sorkar an ngen tih a sawi a, tuna chhiah lak thar tling khawmte chu mipui hnenah a kir leh vek dawn a, ram hmasawna tura kawng hrang hranga hman tura duan lawk a ni, an ti.

Mizoram sorkar chuan hetiang chung a MCVU-in nawrh an kalpui tlang dawn a nih pawhin mipuiin an tawrh lohna turin sorkarin theihtawp a chhuah dawn an ti a, ruahmanna pawh a siam lawk tawh a; mipui tana harsatna thleng zawnga hma la lo turin Mizoram sorkar chuan pawl hrang hrangte a ngen a ni.

Hetihlai hian, Mizoram Commercial Vehicle Union, Information Secretary, Mizoram Truck Owners' Assn General Secretary ni bawk Pu Dina Tlau chuan chhiah pun avanga an tawrhna a nasat lutuk avang leh mipui thleng pawha an tawrh theih avangin sorkar hmalakna chu dodal lo thei an ni lo tih kan corr zawhna chhangin a sawi a, NGOCC nen an inbiaknaah an harsatna hrethiama sorkar nawr ve tho an tum avangin NGOCC thlazar hnuai hmalak an remti hmasaa, amaherawhchu tuna sorkarin chhiah tihhniam a tum leh tak lovah chuan hma an la zui ta a ni a ti.

Pu Dina Tlau chuan tun nilai atanga tuma lungawilohna an tum naah, Aizawl-a Taxi neitute leh Tipper neitu pawl ten an hmalakna an thlawp lo a a hriat thu sawiin, Aizawl khawchhung ni lo, hmun danga taxi leh vantlang phur lirthei te erawhin an zawm ve dawn a ni a ti.

<><><>

NAGALAND

Nagaland Governor, La Ganesan chuan naktuka Vairengte Jt.YMA field-a Hnam inpumkhatna leh hnam ziarang chawilarna programme 'Bharat Ko Jano' hmanpui turin Kolasib District Vairengte-a CIJW School a thleng a.

'Bharat Ko Jano' ah hian Nagaland Governor La Ganesan bakah Mizoram Governor Dr Hari Babu Kambhampati an hun a hmanpui dawn a, Nagaland khawpui Dimapur-a hmunpui nei 'North East Zone Cultural Centre' leh Mizoram sorkara Art & Culture Department tangkawp huaihawt 'Bharat Ko Jano' pual hian vawiinah pawh Vairengte-a CIJM School-ah hun hman tur niin naktuk hian Vairengte Jt.YMA field ah hun hman a ni dawn a ni.

He hunah hian Assam, Nagaland, Tripura leh Mizoram atangin lamthiam ten hnam lam chi hrang hrang an entir dawn a. North East Zone Cultural Centre (NEZCC)-ah hian India hmarchhak State pasarih te bakah Sikkim an tel a ni.

(Andrew Vanlalauva PTC Kolasib)

<><><>

ASEP

Association for Environmental Preservation (ASEP) General Headquarters, Aizawl chuan - Phulpui, Maubuang, Sumsuih leh Thiak ramte kartawnin Ramsial a awm mek tih an sawi a. Ramsial hi humhalh tlat a nih theih nan heng khaw 4 te hi tlawhin a hmuna thil awm dan an enfiah.

ASEP hotute sawi dan chuan Ramsial hi a awm ngei niin a lang a, a rual ni lovin pakhat maltlat niin hriat a ni. Mizorama ramsa hmuh tur vang tawh tak Ramsial a lo la awm chu ASEP chuan lawmawm a ti a, tu kut palh mah a tawrh loh nan humhalh tlat turin heng khaw 4 Village Council (VC) leh YMA-ah ngenna lehkha an pek vek a. Heng khuate pawh hian theihtawpa humhalh an tum thu an sawi ve bawk a ni.

Ramsial hi Nungcha Humhalhna Dan The Wildlife (Protection) Act, 1972 ah Schedule I animal zinga awm a ni a. Dan bawhchhetu chu kum 3 aia tlem lo lung in tan leh cheng nuai 1 aia tlem lo chawi tira hrem theih a ni.

(CORR)

<><><>

ASSEMBLY COMT

Mizoram Legislative Assembly Committee on Public Undertakings chu an Chairman Pu Ginzalala kaihhruiin Committee on Public Undertakings Kerala Legislative Assembly, enkawlina hnuai a awm Corporation hrang hrang tlawh turin nimin khan an zin chhuak a.

An tlawh tur te hi Agro-Industries, Handicraft Development Corporations bakah Tourism Development Corporation niin Kerala-in an kalpui dan an zirchiang dawn a ni.

He study tour hian Ningani thleng a awh ang a, Committee Member Pu V Malsawmtluanga, Vice Chairman, Lunglei High Powered Committee, Pu K. Laldawngliana, Lt. Col. Lalhmingthanga, Pu Lalramliana te an tel a. Mizoram Legislative Assembly Secretariat Pi K. Lalmuanthangi, Joint Secretary leh Pu Rosangliana Chhakchhuak, Committee Officer ten an tawiawm a ni.

(DIPR)

<><><>

SINLUNG HILL ELECTION

Sinlung Hills Council inthlan 2024 atana inpuahchahna kal zelah, nimin khan Aizawl DC Conference Hall-ah Election Observer Pu James Lalrinchhana hovin First Randomisation of Polling Personnel neih a ni.

First Randomization of Polling Personnel-ah hian SHC inthlanna Aizawl District huam chhunga Returning Officer leh Asst. Returning Officer te leh Political Party aiawhte an tel a ni.

Election Commission of India (ECI) in inthlanna felfai leh dik tak neih na tura ruahmanna a siam angin in thlanna a duty tur te, an duty-na hmun tur te, EVM leh VVPAT khawl hmanna tur polling station te hi chhawng hrang hrangin khawl (computer) hmanga thleibik neilo a thliar (randomize) thin a ni.

(DIPR)

<><><>

MSS

Junior Grade of Mizoram Secretariat Service Foundation Training 2024 chu August atanga September thla chhungin ATI, Aizawlah neih a ni a. Nimin atang khan Indian Institute of Public Administration (IIPA), New Delhi ah attachment neiin, training hi an chhunzawm.

IIPA a Junior Grade of MSS ten exposure training an neih hi IIPA Director General, SN Tripathi chuan hawngin, Union Minister of State for DoNeR, Pu Jitendra Singh chuan a hman pui bawk a ni.

MSS Foundation Exposure Training hi Mizoram Sawrkar atangin Course Director, Pi Lalremruati (Dy Director, ATI) leh ATI Asst Directir Pi Daphne Zosangpuii ten an ho a. Training hian October ni 25 thleng a awng.

(PR)

<><><>

PM

Prime Minister Narendra Modia chuan vawiin hian ni hnih cham turin Russia a pan dawn a. A cham chhung hian Kaza-a BRICS Summit vawi 16-naah a tel ang. PM Modia hian Russian President Vladimir Putin-a sawmna angin Russia hi a tlawh dawn a ni.

Russia-a India Palai Vinay Kumar chuan Akashvani News a hrilh danin khawvel ram hruaitute tan BRICS Summit hian khawvel thil thleng pawimawh tak tak sawihona hun a siam sak dawn a ni.

(Newsonair)

<><><>

COP16

Hapta hnih awng tur khawvel sik leh sa leh chhehvel nungcha chhe mek siam tha tura inkhawpui United Nations Biodiversity Conference (COP16) chu nimin khan Columbia-ah tan a ni. COP16 ah hian khawvel ram hrang hrang atangin environment humhalh lama hotute an kalkhawm a. Ram 196 chuan khawvel huap inremna Kunming-Montreal Global Biodiversity Framework an siam tawh a. Tun tumah hian palai hi ram 200 dawn atangin an tel thei a ni. Tun tum COP16 ah hian Kunming-Montreal Global Biodiversity Framework te hi sawrkarin an zawm em tihte an ngaihtuahho dawn a ni.

(Newsonair)

<><><>